


新刊

周禮全經

四



周禮全經卷之四

地官司徒第二

後學柯尚遷釋原

官以地為名象地也地形載萬物司徒掌教以安萬民同也司主也專主一官之事也徒眾也謂萬民也萬物附屬於地萬民附屬於司徒宜矣又古文翻后為司言有司之道與后王相反君道貴寬大有司之道宜執守也

惟王建國辨方正位體國經野設官分職以為民極乃立地官司徒使帥其屬而掌邦教以佐王安擾邦

國

民極以上
解見前

釋曰邦教即教典佐助也因其所性而道之謂之安因其所習而制之謂之擾。○何氏曰仁漸義磨使自得其性者安之也。傳典庸禮使各順其常者擾之也。安則無矯拂扞格之憂擾則有優游浸漬之益安而擾之民自和順於德義矣。

原曰冢宰掌邦治司徒掌邦教二官皆天下重任國之根本也故以天地名之而四官則各司一事猶天地統四時而四時則各司一氣也今觀治則治王宮正百官理財用而教則授民職攷夫屋教

三物正萬民也治舉於上教施於下真由天施地生四時輒運者也後世政教殊軌以政令刑罰爲治以語言誦授爲教則與古悖矣孔子曰道之以政齊之以刑又曰道之以德齊之以禮夫政刑固所以治民而德禮乃所以教民也然皆曰道曰齊則治之亦所以爲教也但古之教者教之以事而理不外焉君臣父子兄弟朋友非民事乎稼穡耕耨徵令貢賦老幼廢疾六畜車輦非民事行於其間乎舍是而爲教抑將何教耶離此而有所謂事何事耶故古之教者惟於日用常行之中引導而

整齊之使之歸於道而合於禮則精義入神之理
即此而在矣故古者謂之教今則謂之治今之所
謂教古亦謂之事也一道一齊用心誠偽之間王
霸之幾判於此能知古人之所以教則大司徒之
職始可得而言矣

教官之屬大司徒卿一人小司徒中大夫二人鄉師
下大夫四人上士八人中士十有六人旅下士三十
有二人府六人史十有二人胥十有二人徒百有二
十人

釋曰教官大小司徒也屬自鄉師至旅下士其屬

六十人也六鄉則鄉師宜六人今只四人者蓋司
徒教灋通於天下故鄉師居司徒之府近掌六鄉
外及六遂都鄙皆稟六鄉教灋故不分治也

原曰鄉師居司徒之府以治六鄉之政令遂師居
司空之府以治六遂之政令然非鄉遂分治也鄉
師行司徒之教灋於六鄉而六遂都鄙效而灋之
遂師行司空治野之灋於六遂而六鄉邦國都鄙
效而灋之然治六遂者居司空治六鄉者居司徒
蓋以六遂在野故治野之灋依之而立六鄉在國
故教灋依之而立國野雖分而教職事職則無備

廢之理矣然鄉遂之中秉天子刑政之權以治之者惟鄉師遂師而已都鄙之中則縣師也鄉遂大夫以下皆民秩也爵位雖高不敢與二師抗矣故知賢能位職之辨然後可與言周禮也

鄉老二鄉則公一人

釋曰鄉老者致事公孤之老鄉官之爵最尊者昔成王立三公三孤爲王者師周禮無其職惟此有鄉老宰夫同士有三公之位蓋在朝之公孤受大都百里采地者也公侯伯子男又在外諸侯之爵皆爲在位之選也二鄉公一人六鄉則三公也○

丘氏曰鄉大夫猶有職掌鄉老惟大比與賢能則與焉在朝稱公在鄉稱老侍坐於天子而不爲偪與百姓相親而不爲褻惟道所在上而論道於王外與六鄉之教其要爲民是以司徒見之也

鄉大夫每鄉卿一人州長每州中大夫一人黨正每黨下大夫一人族師每族上士一人閭胥每閭中士一人比長五家下士一人

釋曰比者比也相共之義也有長以別之二十五家爲閭胥有才智之稱百家爲族師帥也以德行帥人者也五百家爲黨正者爲人所取正也二千

五百家爲州、長者衆人之尊也、萬二千五百家爲鄉、直以本秩名之、大夫尊也、卿爵也、上大夫之稱也、是故天下國家者一家之積也、比閭族黨州鄉者、民居多寡之等也、五人之長、百人之長、千萬人之長者、德有大小、故位有崇卑也、先王爲鄉、灋以總其教、爲品秩以等其爵、視其爵位、立其家灋、爵尊則家大、使各治其家、以爲下觀灋焉、則賢否才德自見、所謂教職者、乃在於此、則賢愚貴賤咸獲其所矣、王道之本在此哉、

原曰、鄉、遂之灋、其治天下之大本、即人之生也、愚知不同、才能亦異、不有以處之、則強凌弱、衆暴寡、上下不辨、民志不定矣、天下何由而治哉、聖王於是以自然之道而經理之、自五家之比、而至於萬二千五百家之鄉、自五家之鄰、而至於萬二千五百之遂、自比長、一下士而至於鄉大夫之卿、自里宰一下士而至於遂大夫、皆鄉舉里選、月書季考、必其人之德行道藝、可爲五人之長、以至萬二千五百人之長者爲其位、以處之、爲其爵、以等之、則才德各稱其位、人無慕外之心、使其志慮不易、視聽純一無不在於脩德學道、以聽在上之旌舉也、

聖王御世能使天地萬物各得其所其術如此可謂至簡至要矣其灋具於此條之中更千古莫有能悟之者是以致用無術賢才無所而古今遂以判也何以明之有官府必有府史胥徒無之非官府也今鄉老而下自鄉大夫至比長皆以爵聯民居爲差等無府史胥徒之設何也此賢者之位位焉既定則設官分職皆以維持乎此而已故凡周官有府史胥徒皆能者之職惟此與公侯伯子男爲賢者之位不先定乎位又何以施其職哉曰鄉遂大夫而下皆有職何也曰此教職也夫教者以

德行帥人也非以語言誦授也其教之具則不外乎三物惟其身有乎此然後帥人以此治家有灋然後能教人以家灋不在刑政之末也何官府之有是故天下之人雖多不出乎六等天下之家雖衆不外乎比閭天下之教雖殊不離乎三物有其德則有其位有其位則立其家立其家則司其教不明乎位職之辨何以知司徒之教灋哉

封人中士四人下士八人府二人史四人胥六人徒六十人

釋曰聚土曰封謂壝墼埒埒及小封疆也封人事廣

故其徒多然用之有時也

鼓人中士六人府二人史二人徒二十人

釋曰鼓人兼掌金而稱鼓人者金以節鼓也不屬司樂者以金鼓和軍旅正田役鄉野之事也

舞師下士二人胥四人舞徒四十人

釋曰舞師掌教舞蹈徒執役而舞者此官主教舞以供野祀司樂之舞則學士為之

牧人下士六人府一人史二人徒六十人

釋曰主牧六牲以祭祀

牛人中士二人下士四人府二人史四人胥二十人

徒二百人

釋曰此官主牧祭牛凡牛堪祭祀者則牛人選入牧人牧之臨祭之前乃授充人而繫養之

充人下士二人史二人胥四人徒四十人

釋曰充肥也養繫牲肥之

原曰封人為社稷而設也牧人牛人充人為祭禮而設也鼓人舞師為祭樂而設也民為貴社稷次

之然則司徒蓋為民而立社稷禮樂祭祀皆為民而設故此六職次於司徒之下可以見民事之所

重司徒之所先矣故曰為國者先盡禮於神而後

致力於民故幽明各得其所也夫盡數六師而載師上士二人中士四人府二人史四人胥六人徒六十人

釋曰鄭氏曰載之言事也事民而稅之愚按載師掌任地之灋專司貢灋也自國中至鄉遂都鄙皆貢助並行鄉中多貢遂都鄙亦有八等之田其灋俱掌於載師而辨其輕重之稅如後世之均則也問師中士二人史二人徒二十人

釋曰以其周知閭里之情故曰問師掌任民力也處於閭里之間與民相從事使之量其地宜以施

九職而責其成功也

原曰地不任則荒人不任則惰地荒則人之衣食何資人情則必棄本業而事末作故先王設載師以盡天下之地其灋曰民苟有分五畝之宅而不種桑麻者必出里布分百畝之田而不耕者亦出屋粟無職而不受田者亦出夫稅家稅何者以地不可荒也又設問師以任天下之人使入於九職以着其地灋曰民必歸其職無職者布縷之征不可免也故出夫布不耕不樹不蠶不績者各有罰所以振作天下之人而使之不惰也地不荒人不

惰則衣食有資而恒產定矣勞則善心生逸則惡心生勞而不淫則恒心存矣有恒產有恒心俗之所以善治之所以成也二職之設其可緩哉

縣師上士二人中士四人府二人史四人胥八人徒八十人

釋曰主都鄙土地人民之事徵野賦貢蓋兼載師閭師二職而居於都鄙之中至縣而止縣正則鄉官縣師則命官也故其權與遂師同

原曰八命賜則受采地曰都鄙天子使吏治之者其縣師也故曰掌稍甸郊里之地域即都鄙之地

也辨夫家稽畜輦攷群吏詔廢置即遂師以行於遂者也徵野賦貢即載師閭師之事也然則此官蓋兼鄉師遂師載師閭師之職專一邑之刑政者也不為都鄙之正官乎即後世之知縣也

遺人中士二人下士四人府二人史四人胥四人徒四十人遺音位

釋曰遺饋遺之遺掌委積之官雖待六事之用然待賓客其要也如今之主驛傳者

均人中士二人下士四人府二人史四人胥四人徒四十人

釋曰此官主均平土地之征經界之守均地利而
入九職均人力牛馬車輦公役之征

原曰遺人均人之設亦爲國至要之務也遺人不
設則國無委積道路不通賓客無館凶荒不備行
旅何能出於其途哉均人不設則賦稅不均經界
不正地職不明而力役公上者亦不均矣三征不
均則欺詐幸免之俗興而奸邪悖亂之徒起矣天
下不平乃由於此故六鄉必設遺人均人六遂必
設委人土均蓋以民務莫要於此後世遺人無委
積之掌而驛傳之灋至於病民之深均人則絕無

焉亦以經野之事制產之灋皆不舉行此職無由
而施故也

師氏中大夫一人上士二人府二人史二人胥十有
二人徒百有二十人

釋曰以道教人曰師世守其官曰氏師氏教王宮
以德行詔人者

保氏下大夫一人中士二人府二人史二人胥六人
徒六十人

釋曰保安也以道安人者保氏教國子六藝六儀
乃王宮小學之師師氏王宮大學之師其職本以

詔王微與諫王惡則其教自王以下聽焉且掌國中失之事帥屬守門闈則古之教者必付以權其教乃行豈在於語言誦授之間耶

原曰師氏掌以媾詔王以三德教國子保氏掌諫王惡而養國子以道皆居虎門之左其制何如王制曰小學在公宮南之左大學在郊尚書太傅曰王子八歲而出就外舍束髮而入大學公卿之世子大夫元士之適子十有三始入小學十八入大學蓋虎門者天子路寢之門師氏德行大學之教也保氏藝儀小學之教也由是觀之則公宮之左

必有大小二學可知矣王子八歲入小學束髮入大學者入學之期也國子必十三入小學十八入大學者蓋國子與王子共學必稍長乃知貴賤之禮上下之分且使王子有輔仁之益故其期不同如此然則在郊之大學王子不入乎曰周制太學在郊者省朝謁之勞專學業也天子曰辟廱諸侯曰泮宮辟廱四門四橋東曰東序西曰瞽宗南曰成均北曰上庠東序即東膠也上庠即虞庠也其師即大司樂也鄉遂都鄙賓興之俊士天下侯國歲貢天子之造士國子及倅諸子教成材者皆學

於此焉但王子之學則在公宮之左泚大學有時而與國子齒此記所以有將君我而與我齒讓者欲其知父子君臣長幼之義也夫周人之於王子國子其教之也詳其責之也深其養之也至王子之教其適將以宗廟社稷屬之爲天下得人也其庶將以有國有家付之爲民神之主也可不重歟國子之教以其席父兄之勢豢宮圍之安不有師道之尊嚴則何以保自然之和禁未萌之欲又有以變化其氣質涵養其德性也哉此師保之任所以爲天下大本也

司諫中士二人史二人徒二十人

釋曰諫猶正也此官掌糾萬民之德行而巡察鄉遂都鄙之教者丘氏曰即今之提學官將以扶植正學維持公論者也

司救中士二人史二人徒二十人

釋曰語曰汝弗能救與此官以禮防人之過糾察人之臯惡者也

原曰先王於王宮之教既有師保矣又以萬民之教鄉遂以下之職或怠廢不舉苟且以欺上也又設諫救二職以勸糾德行而巡察過惡所以輔翼

警飭之者無所不至則為教者豈敢苟且具文而
萬民豈敢怠於為善而肆於為惡乎然後知萬民
之諫救即王宮之師保也

調人下士二人史二人徒十人

釋曰調和合也此官主平成人之相讐殺者

丘氏曰凡人之情方其有觸則怒怒則爭爭則鬪
鑊在前不顧也及其怨隙已成殺傷被執退省其
身已無生路追念父母妻子不可復見未始不悔
悟而恨旁人之不我救止也先王灼知人情之隱
設調人以諧和於始使不至於此忠厚之至也

媒氏下士二人史二人徒十人

釋曰媒之言謀也謀合異類使和成之今齊人麴
麴名曰媒蓋釀合之義也

原曰男女之合人倫之本風化之原也詩首關雎
書美釐降禮謹大婚人道自是始焉故先王設官
以司之子生必書其月日與名藏之以立其根然
後視其才質而媒合焉故無怨曠之失無反目之
虞政微俗美何莫不由此也

司市下大夫二人上士四人中士八人下士十有六
人府四人史八人胥十有二人徒百有二十人

釋曰司市雖主平市然商賈一項人民皆其所統財利盈縮之間而教未始不存也

葉氏曰先王授民以井田足食也制商以市廛通貨也食足貨通而後教化可成矣是以匠人營國則前朝而後市內宰建國則佐后而立市市也者所以通商賈而阜貨財也昔者神農氏作日中爲市致天下之民聚天下之貨交易而退各得其所此市之所以作也而聖人必先之曰何以聚人曰財理財正辭禁民爲非曰義毋亦曰朝與市有義利之分王與后有陰陽之別生財自有大道有國

者當以義爲利不當以利爲利者歟

質人中士二人下士四人府二人史四人胥二人徒二十人

釋曰質平也主平定物價者

廛人中士二人下士四人府二人史四人胥二人徒二十人

釋曰廛民居區域之稱鄭司農曰廛謂市中之地未有肆可居以藏畜貨物者孟子曰市廛而不征灋而不廛謂貨物藏貯於市中而不租稅也愚謂市宅也公家所立爲市之宅故有廛布之稅而廛

人主歛諸布蓋歛市租之官非止管市宅而已司
市質人廛人三官乃命官胥師以下則給役也

胥師二十肆則一人皆二史賈師二十肆則一人皆
二史司覈十肆則一人司稽五肆則一人胥二肆則
一人肆長每肆則一人

賈音嫁
覈音暴

釋曰鄭氏曰自胥師以及司稽皆司市所自辟除
胥及肆長市中給繇役者胥師領羣胥賈師定物
價司暴禁暴亂司稽察留連不去者愚謂肆長則
主一肆猶一家也胥師賈師管二十肆司覈十肆
司稽五肆皆肆長之有才智者爲之立市之灋以

二十肆而止與比閭不同

原曰自肆長而上胥師而下其市之所以成乎以
肆長爲主則爲賈而坐肆者也無肆長則無市矣
胥與司稽司覈固肆長爲之賈師平物價胥師掌
治訟皆巨賈之有才者與之權而統率之猶夫比
閭族黨之灋非命官也故鄉制則萬二千五百家
而止市制則二十肆而止何也義欲其長利欲其
短也廛人質人泉府則司市之屬設官也肆長而
上不在鄉遂之數不隸教官以其近利也舉選不
取以其無教也自胥師以下皆無秩明商賈不敢

與士君子齒也。遠郊之內有賈田，司市與其屬之
祿也。胥師以下無秩，則無祿矣。蓋先王之立市也，
不使雜於閭里，懼其亂教也。不設朝廟之前，以利
爲後也。不使士農爲之，以商賈之人持心近薄，恐
其亂俗也。是故設於國之陰，而主之。以后祭以陰，
禮其先義後利之制可見矣。夫利平人不可親也，
恐其溺心也。有位不可親也，恐其蕩志也。故令國
君夫人世子命夫命婦皆不得過市，過則有罰。其
作灋之嚴如此。先王之遠利何如哉。昔者晉之富
商韋籜木捷，以過於朝，而曰雖有澤車華服，不敢
與士君子齒。則周公之遺化固存什一於千百矣。
後世立市無灋，士農君子雜而爲之，是以億兆之
人皆驚于利。士君子而有商賈之行，聖人以道治
天下之意，今亡久矣。

泉府：上士四人，中士八人，下士十有六人，府四人，史
八人，賈八人，徒八十人。

釋曰：泉即錢也。泉府之官，主以征布歛貨，使商不
失其本，以貨而平賣之，使官不費其財，民有祭祀
喪紀急用者，則賒之，不取息，以利民也。民之貸者，
以國服爲息，以懲貪也。六鄉有泉府，以泉以貨賒。

周禮全經 卷之四 十一
貸鄉民六遂有旅師聚三粟以貸貧民平頒興積
皆先王立通融之灋以行周貧補助之政所以利
民非以利國也民利則國利矣

原曰泉府之設聖王立應時取予之灋以通天下
之貨以濟天下之民乎故貨有貴賤時爲之也未
有貴而不賤賤而不貴者泉府以征布歛時所不
售之貨使商不失利所以利商也時之既至必有
求買者乃從其原抵賣之使官不失利民不從貴
所以常平也民有喪祭困急則賒之立期取償而
不取息所以濟人於困以廣仁也民有願貸則以
其身服役國事爲息願以身役可以徵貧不願不
強也夫其取予之間上不失時中不失官下不失
民是先王所以流通百物拯救萬民裁成輔相之
道也豈若劉歆六幹立灋安石青苗市易堂堂大
國皇皇求利者哉

司門下大夫二人上士四人中士八人下士十有六
人府二人史四人胥四人徒四十人每門下士二人
府一人史二人徒四人

釋曰此官主啓閉國門譏察不物防寇盜守國固
者不征商惟犯禁之物則舉之

司關上士二人中士四人府二人史四人胥八人徒八十人每關下士二人府一人史二人徒四人

釋曰王畿千里於五百里界首面置三關共十二關此官主譏察出入防寇盜與門市為聯

掌節上士二人中士四人府二人史四人胥二人徒二十人

釋曰節符信也行者所執以為信

原曰司門司關掌節三官皆掌譏察之官門關主於譏察貨賄人民掌節所以通乎譏察者夫民之奸偽四出有國者不有以譏之則亂不有以通之

則滯聖王所以遏禍亂之原實在於此烏可忽哉

地官上

大司徒之職掌建邦之十有二教以佐王安邦國擾萬民

釋曰此按五官之例而正之者也元本大司徒之職之下曰掌建邦土地之圖與其人民之數以佐王安擾邦國大司空之職闕焉臨川吳氏取孟子舜命契五教之目補之續以因此五物者民之常而施十有二教焉丘氏曰觀十有二教之施不係於五物則知此二句為羨文而司徒安擾邦國者

不在於土地之圖、人民之數、其爲冬官之文、錯在於此無疑也。

愚按周禮乃成周一代之典、及周衰諸侯相吞、遂違周公封國之制、孟子曰、諸侯惡其害已、而皆去其籍、則周禮孟子時已亂矣、至漢其書始出、惟存五官、河間獻王嘗購以千金、莫能得、乃以考工記補冬官、至宋俞庭椿乃謂冬官錯於五官之中、而有復古之編、吳臨川祖其說、而有五十字之補、夫司空之職、以考工記補之者、固妄、而曰錯於五官者、亦非也、司空之職、具在、無待於補也、蓋自去籍之後、書已錯亂、遂人即小司空也、以變小司空之名、故續於地官之後、而大司空之職、以無所附、故併於大司徒之中、特去大司空之職、五字而已、豈遂亡哉、十二教、正司徒之職、掌也、而次於土、會五土、物生之後、以不相續也、遂增因此五物者、民之常、二句、是司空之職、盡入於司徒也、後儒雜取冬官於五官之中、辨職不明、各以己意、移易經文、無所證據、則六官皆亂矣、名爲復古、實亂古也、竊不自揆、更考經文、以遂人序官之數、與五官相同、有旅字之別、則知遂人以下皆司空之職、又以大官

辨職考之教職言安言擾事職言富言養則知土地之圖封疆之制非司徒之職而十二教與頒職事所謂安與擾俱盡之司徒之職又可知矣二職之分以經證經斷無可疑非逞已見者而司徒司空之職皎如日月是周公以全經遺萬世者可無憾矣

一曰以禮禮教敬則民不苟二曰以陽禮教讓則民不爭三曰以陰禮教親則民不怨四曰以樂禮教和則民不乖五曰以儀辨等則民不越六曰以俗教安則民不偷七曰以刑教中則民不譟八曰以誓教恤則民不怠九曰以度教節則民知足

疏薄報反

釋曰安上治民莫先於禮欲民盡五常之道必以禮教之祀禮祭祀之禮外祀則州社黨禴族酺也內祀則祖先之祭禮祈報以教敬追遠以教孝孝敬合一則自無輕慢苟且之失矣陽禮則冠也射也飲酒則相見也教以敬長尚齒貴德尊賢則其心和順自知遜讓之道無爭競之失陰禮者婚姻之禮及父子異宮之類教以男女有別婚姻以時于致情於親則親愛之心生而怨曠可免矣移風易俗莫善於樂樂禮者燕饗祀神庠序皆教以作

樂興舞則民情和洽向善而不能已無乖戾之失矣此則儀禮家鄉之禮其綱在此皆宗伯頒之儀者宮室車旗衣服器用禮節各視鄉官之秩使貴賤隆殺等級分明則上下以辨民志以定無有僭越踰分矣此典命掌之俗即本俗六事也教之齊車服興孝弟尚道義則衆心安定民風淳厚不偷薄矣刑即鄉之八刑時有不率教者則有弼教之刑其附于五刑者歸于士斯無橫暴而難制者矣誓者糾戒也恤憂也鄉中以時讀灋而糾戒勸勞之使之知憂勤而盡職則不敢怠惰矣度品制之度分鄉官爲六秩不使僭踰辨其賢否以別貴賤而定其制度如五儀六服六摯之類則民皆率德安分而知足止矣

原曰大矣哉聖人以度教節之意乎蓋凡人耳之好聲目之好色鼻之好臭口之好味苟窮其欲雖匹夫而擬萬乘或未足以厭其心也是聖王既以五儀之命等在位之人又以鄉遂之秩行民俗之內使之比長少別於齊民其宮室衣服飲食賓客閭胥不得以勝族師而族師又不得以過黨正司徒又以儀等辨之不使踰越而辨施舍又嚴於貴

賤之等是故無德而富則秩不加有德而貧則祿必益故雖有千金之資惟無德則與下戶爲伍宮室不得侈而衣服不能華則飽食之餘無所用温煖之外無所求柰之何不率德厲行以聽人之旌舉哉故鄉遂之灋行儀等之辨嚴所以正人心美風俗行教化之大機也

十曰以世事教能則民不失職十有一曰以賢制爵則民慎德十有二曰以庸制祿則民興功

釋曰鄭氏曰世事世習其事猶管仲云士農工商各專其業少而習焉其心安焉不見異物而遷焉

是也愚謂世事世間才藝之事鄉遂治事之吏皆學世事而有能者使隨所長而任職則可謂使能而令之不失職矣賢有德行者爵位也鄉民之中有德行者進以爵秩是以賢制爵也則民孰不勉而脩德哉祿以酬功鄉吏盡心於庶職以功而詔祿則莫不勉於興功而盡職矣二者尊賢使能之事司徒掌教之大權也

原曰舜命契爲司徒教以五典而周禮十二教不及五典何也曰五典言其理十二教施其事是故教敬則親矣教讓則序矣教親則別矣辨等則義

矣教安則信矣五典雖舉其要孰若司徒所教措之於事周詳曲折各得其條理哉夫教之道廣矣大矣先德禮而後刑政教和教中者所以師其進德也教恤教節者所以作其憂勤也制爵制祿者所以勵其激勸也孰非所以扶植五教本乎事而納之於道也乎故觀十二教之目則古人所以為教之事可知矣固無待於補也

頒職事十有二于邦國都鄙使以登萬民一曰稼穡二曰樹藝三曰作材四曰阜蕃五曰飭材六曰通財七曰化材八曰歛材九曰生財十曰學藝十有一曰

世事十有二曰服事

釋曰頒職本在縣灋之下今以司徒大政所在故移於此頒布也登載也布萬民之職事而載於籍焉稼穡即三農生九穀也樹藝即園圃毓草木也作材即虞衡也阜蕃即藪牧也飭材即百工也通財即商賈也化材即嬪婦也生財隨宜以為生固不專於轉移執事也太宰分職而司徒頒之乃見施行之實也九職之外又有學藝謂有道藝如禮樂書數之類致用於事功之實也世事如農圃醫卜祝史之事藝之小者所謂世事教能是也今欲

補內六記即學藝是也外六記即世事是也服事給公家之役如府史胥徒之類是也故九職定其本十二職舉其繁天下之人雖多豈出於十二職之外哉無職則為浮民遊手聖王不容者也

原曰天下之治在於民有職天下之亂在於民無職故太宰分職矣必司徒頒之乃得其所也由是而司空均職鄉遂施職閭師任職凡治民之官罔不以民職為事誠以民之為生皆上所以與之一技能之微一動作之末上皆為之區處至於一德可稱一能可取必使之待用而不遺民之父母其

信然矣後世非惟不為民分田制產以為生且民職不分服田畝者征科百出而歛之若讎民遂厭農畝而不事至無以為生乃浮巧逐末任其自生為僧為道為雜技者半農人焉而上不之恤馴致大亂何莫而非不頒民職之故哉

以荒政十有二聚萬民一曰散利二曰薄征三曰緩刑四曰弛力五曰舍禁六曰去譏七曰青禮八曰殺哀九曰蕃樂十曰多昏十有一曰索鬼神十有二曰

除盜賊

弛施氏反舍音捨去上聲音殺所界反蕃方表反

釋曰施十二教教之頒十二職養之民得其所矣

凶災之變不可不防也故以荒政繼焉散利發倉廩以賑貸之薄征減其賦稅也緩刑省其刑罰也弛力寬其力役也舍禁山林川澤之利令民不時取之也去譏關市之上非惟不征雖譏察亦去之也青禮凡吉禮及賓客之奉皆省之凶荒殺禮也殺哀凶禮葬祭不求備也蕃息也止息音樂飲酒不樂也多昏不備禮許嫁娶也鬼神能助陰陽為水旱札瘥者必索而祭之盜賊之起由於凶荒故盡心荒政則盜賊自除矣

原曰水旱堯湯不能免故聖君賢相既脩德行政

調和陰陽無所不用其至矣而司徒親民之官復以荒政為首務何也蓋不恃吾有德是以格天而恃吾脩政足以應天如子之於父母能保其不怒哉要在起敬起孝而底豫之也故脩政所以脩德也然十二荒政以散利為先利不散則民不聚雖有青禮蕃樂殺哀多昏之舉行未必有實惠及民也然利苟不備於平時則臨事將何所散哉周人為荒政之備者詳矣旅師泉府積三粟與歛不售者平頒與積而賒貸之遺人掌縣都委積以待凶荒倉人掌粟入之藏以待凶荒而頒之蓋以三年

耕而餘一年之食九年耕而餘三年之食是以天不能災而人不能害者以備先具也不知乎此而欲脩德以應天也不亦迂乎

以保息六養萬民一曰慈幼二曰養老三曰振窮四曰恤貧五曰寬疾六曰安富

釋曰保安也息生也謂保安其民使之蕃息也丘氏曰救荒之政如攻療保息之政如調理幼者慈愛之如產子三人與之母二人與之餼是也老者養贍之如七十者賜以粟八十以上者賜以帛是也鰥寡孤獨皆天民之窮者必有以振救之飢寒

匱乏貧不能自存者必有以調給之疾病者寬其力役使得保其性命家富者平其賦役書其勤敏使保其常產而不侵削之行此六者則民皆得其所矣

原曰歲飢民困災變不虞民欲自食其力而不可得者先王爲救荒之政可也至於平時爲生宜自力也復爲是保息之政何哉蓋民之困窮固由於凶荒亦有不凶荒而困窮者則幼者資人以生老者資人以養窮者無所控訴貧者不能自給疾者廢於天刑皆不可無保安之政也詩云嗇矣富人

哀此輦獨先王既有荒政聚之於災變之日又有
保息養之於無事之時真所謂如保赤子父母天
下之心也

以本俗六安萬民一曰媿宮室二曰族墳墓三曰聯
兄弟四曰聯師儒五曰聯朋友六曰同衣服媿與美同

釋曰本俗者使民風習俗不離於本奢侈相矜強
弱相勝皆離本者也民不安原於俗之偷弊故本
俗所以安萬民也朴而不壞華而不僭謂之媿鄉
遂比居之灋以閭巷之形畫畷使貴賤有等華朴
得宜則相帥以安分矣族猶類也類其墳墓使祖

禰體魄不遺則莫不敬宗重遠而相帥以孝敬矣
聯合也使之有次序不相凌也兄弟手足之愛易
於睽違聯之使情義相得則莫不相帥而遜弟矣
師儒有道德者聯之使先覺覺後覺則莫不向學
而尊道貴德矣同師曰朋同志曰友聯之使合志
同方營道同術則莫不相帥相讓以敦信誼矣衣
者身之章也等級由之以分同之使制度有常上
下有等則莫敢詭異而僭越矣誠能行此六者則
文質彬彬泰和之氣象也太宰九兩有宗族師儒
朋友則天下之治必以道德孝弟為先也可見

原曰古人有言上行下效謂之風衆心安定謂之俗風俗之臧否天下治忽隨之周公有見爲治之大原故立本俗之灋於司徒誠以俗不正則民不安故燬宮室以安其生族墳墓以安其死聯兄弟以安其情聯師儒以安其教聯朋友以安其業同衣服以安其分自其生死之安也而孝敬之俗興矣自其情分之安也而遜讓之俗興矣自其師友之安也而道義之俗興矣三者之俗興則不賞而勸不怒而威遷善遠罪有不知誰之爲者有不在於本俗之六事也哉

正月之吉始和布教于邦國都鄙乃縣教象之灋于象魏使萬民觀教象浹日而歛之

釋曰正月陽和始布之時縣教象之灋于雉門之兩觀政教之始也布教謂頒布教灋之文書縣教象謂以教灋畫之於板而縣之也邦王畿國侯國也都鄙王畿侯國皆有之司徒之教通於天下者也

乃施教灋于邦國都鄙使之各以教其所治民令五家爲比使之相保五比爲閭使之相受四閭爲族使之相葬五族爲黨使之相救五黨爲州使之相調五

州爲鄉使之相賓、州之民也王畿侯國都鄙之君長各釋曰施教灋即鄉灋也王畿侯國都鄙之君長各使其鄉官行教灋故曰使之各以教其所治五家則號爲比比次之義善惡纖微必知使相保任不得爲惡二十五家則號爲閭左右爲之門以稽出入同巷而居良者使相容受惡者毋得相隱百家則號爲族有同宗合族之義一家或有喪衆共助之故曰相葬五百家則號爲黨有相黨援之意故患難則合力救援二千五百家則謂之州州之言周也有無相通賙其匱乏萬二千五百家爲鄉鄉

向也人所向往上令而下從也三歲大比彼有賢能我從而賓之我有賢能彼又來賓我此鄉遂不獨王畿大國三鄉三遂次國二鄉二遂小國一鄉一遂不成鄉遂則爲都鄙其教灋皆同

原曰天王大一統者也故鄉遂之灋軍伍之制皆通之天下無不同焉是以司徒施教司空治野司馬制軍其灋皆同皆曰邦國都鄙也曰然則比閭族黨在國中鄰里鄣鄙在四郊何也曰國中多君子故教灋依之而立四郊多野人故治野之灋依之而立天下莫不有鄉遂莫不有都鄙也是故在

司徒以掌其教則有比閭族黨州鄉之名在司空以掌其野則爲鄰里鄣鄙縣遂之名在司馬以掌其兵則爲伍兩卒旅師軍之名均此民也而治灋有三先王恐三者之灋名實相紊也故分其所屬而辨其輕重使爲治者因其宜而制之國中多君子而教灋重也則當鄉之名四郊多野人而治野之灋重也則當遂之名都鄙雖未成鄉遂也而比居之制立教之灋田野之事無不同也及用軍旅之時司馬稽其人數更立伍兩卒旅師軍之制名雖異而數則同均此民也教灋必行於遂都鄙治

野之灋亦行於六鄉制軍之灋鄉遂都鄙均焉是以各有所屬而通於天下自其各有所屬也而職掌明焉輕重審焉自其通之天下也是以一視而同仁並行而並事焉故匹夫爲善於千里之外可得而知也爲惡於千里之遠可得而糾也故曰聖人之於天下也一視而同仁篤近而舉遠

以鄉三物教萬民而賓興之一曰六德知仁聖義忠和
二曰六行孝友睦婣任恤三曰六藝禮樂射御書數

釋曰以鄉者以上文鄉灋也三物德行藝也賓賓

禮也興舉也以鄉灋之三物教天下之民德不足
取之行行不足取其藝有德行則謂之賢有道藝
則謂之能鄉大夫以鄉飲酒之禮舉之獻賢能之
書也德謂道得於心知者明睿畢照仁者博愛無
私聖者思能通微義者處事合宜忠者內外如一
和者順適無乖然皆五性之德和者禮之德忠者
信之德而聖則兼五者之德也行者以德而見於
行事也孝謂善事父母友謂善於兄弟睦謂親於
九族娣謂親於外親任謂信於朋友恤謂矜憫孤
弱然孝者百行之先五者孝之推也六者之序人

生本于父母罔極之恩也故孝居先兄弟與吾同
出于親故友次之九族同出于祖宗故睦次之五
服異姓之親骨肉相聯故娣次之朋友合志同方
故任次之鄰里鄉黨相安而居故恤又次之藝者
習之於事也禮五禮習熟其儀文度數樂六樂能
知其節奏鏗鏘射以觀德御以馳驅書以形天下
之文數以計天下之物此六者皆道之所存也故
曰道藝

原曰三物其盡教之道乎得之於心之謂德行之
於身之謂行習之於事之謂藝其道則一而已矣

分而言之德行所以成已道藝所以成物三者皆
吾性完具而不可一闕焉教者豈能強於性分之
外哉但人之才質不同故於三者互有長短是故
德行道藝俱全者謂之大賢大能賓興舉之於王
以當大用矣司諫所謂辨其賢能而可任於國事
者是也長於德行而畧於道藝則謂之賢長於道
藝而德行次焉則謂之能下文所謂使民興賢出
使長之使民興能入使治之是也上者賓興於王
次者進退其秩此之謂賢者在位能者在職苟道
藝不足而德行能存者質實之人耳德行不足而

道藝獨長者才藝之士耳以位職之小者處之俱
無可取則隨其位職而廢置行焉此三物之論也
傳曰德成而上藝成而下行成而先事成而後先
王有上有下有先有後然後有制於天下此賢能
之別也故天下之人不同而三物之教則同天下
之才不同而賢能之成就則同先王以賢而處位
以能而任職二端既明天下可運於掌矣

以鄉八刑糾萬民一曰不孝之刑二曰不睦之刑三
曰不嫺之刑四曰不弟之刑五曰不任之刑六曰不
恤之刑七曰造言之刑八曰亂民之刑

釋曰刑以弼教故不從三物之教者則設刑以糾之麗五刑者歸之士師鄉刑亦朴罰而已不弟即不友也不言友者凡不友者教之弟不恭者刑之造言謂訛言惑衆亂民謂亂名改作執左道以亂政者德藝不設刑獨於六行有刑者蓋德無可見而行有可徵有德必有行以行考其德思過半矣藝則人之材有不可強者故教以德藝而糾之以行先王之教內外兼舉如此

原曰刑以弼教其依禮而言者與教者何教以禮也六行之教內則曲禮少儀也此三禮者鄉之所

以爲教也教之不從然後以刑一之刑必依禮而制者也故曰仁與義互爲交脩禮與刑相爲表裏刑也者帥其由禮也苟不教以禮而徒以刑一之則刑之者不知其所由用刑者惟徵之於灋是孟子所謂不教而殺罔民者也故古者制行必徵之於禮行灋者以禮而議刑夫是之謂表裏之義也以五禮防萬民之僞而教之中以六樂防萬民之情而教之和

釋曰禮吉凶賓軍嘉也樂六代之樂也僞者心未受而強從之謂情與僞對蓋流蕩縱肆而不可拘

檢之謂中者抑其過引其不及使歸於中也和者變化鼓舞使之心志融悅以入於道也中和者民之性情也教民者必求至於是以為準焉

原曰先王之於民既以三物教之八刑糾之道教亦云備矣又以禮樂防之何也夫民力分未及而強施之則悖知識未至而強聒之則勞斯皆心未能受者也而遽以刑迫之則未免強從於外免而無耻矣故名之曰偽禮者聖人本天理緣人情而畫為制焉使賢知者不得而過愚不肖者亦勉強而企及教之具必以此為先焉使其尊卑貴賤日

用彝倫皆循是為守則民有所據依自率德安教免於偽矣非防偽教中之道與孔子曰道之以德齊之以禮此之謂也夫禮者天地之序也樂者天地之和也和序人心之本也序則相敬和則相親而情正矣故禮勝則離離則情僻情僻則流流則忘返先王懼其離而流也故以樂和之凡燕饗祭祀庠序之間必教以歌舞之樂所以宣其和而節其流則情無乖戾歡欣和悅以進於善體教自不能已矣非防情教和之道與孔子曰有耻且格此之謂也則先王之為天下亦奚為哉禮樂而已後

世以刑政代禮樂治功之盛高不出乎五霸之間
禮樂雖存具文而已歐陽子曰三代而上治出於
一而禮樂達于天下三代而下治出於二而禮樂
爲虛文憶斯言也判古今於一言決王伯於萬代
者與
凡萬民之不服教而有獄訟者與有地治者聽而斷
之其附于刑者歸于士

釋曰不服教不從而違教灋者爭賄曰訟爭罪曰
獄地治謂爭地而訟者小司徒曰凡民訟以地比
正之地訟以地圖正之即此是也士謂鄉遂士附
麗也司徒聽訟施鄉刑扑作教刑也其有麗於五
刑者則歸之士師使審察而正其罪

祀五帝奉牛牲羞其肆享先王亦如之大賓客令脩
野道委積大喪帥六鄉之衆庶屬其六引而治其政
令大軍旅大田役以旗致萬民而治其徒庶之政令
釋曰祀五帝謂迎氣四郊及大饗帝於明堂奉猶
進也牛能任載地類也奉牛牲謂薦腥也肆陳體
骨也羞其肆謂薦熟也享先王四時禘祫皆是也
亦如之奉牲羞肆也大賓客謂諸侯來朝大司徒
令遺人於野路之上脩治途道及委積芻薪米穀

以待之也。大喪王后之喪也。六引喪車索也。六鄉屬六引。六遂主六紼治政令。徒庶喪事之戒令也。大軍旅謂大司馬九伐之事。大田役謂狩田大閱之事。旗盡熊虎者也。當用衆之時則以此旗致其徒衆而治其戒令。

若國有大故則致萬民於王門。令無節者不行於天下。大荒大札則令邦國移民通財。舍禁弛力薄征。緩刑。

釋曰：大故謂國有寇兵也。致民於王門衛天子及備詢謀也。節六節有節乃行防奸細也。荒凶年札

疫厲也。移民移其少壯以就食也。通財許賒貸不閉糴也。蓋民食之不足移之以就有餘。通之以濟不足。舍禁弛力薄征緩刑皆荒政之事。

歲終則令教官正治而致事。正歲令于教官曰各共爾職脩乃事以聽王命。其有不正則國有常刑。

釋曰：正治明處其文書也。致事上其計簿也。歲終令所屬計一年之要也。改歲教灋未頒止令其官屬而警戒之。田各共其所治之職脩其所作之事以聽王命者以王之誅賞皆依各職所上之功過也。不正謂不共職而脩事者常刑司寇官刑也。

原曰前乎周官舜命契爲司徒則曰敬敷五教在
寬後乎周官則穆王命君牙爲司徒而曰弘敷五
典式和民則司徒之掌教尚矣故成王作周官亦
曰司徒掌邦教敷五典擾兆民然則司徒之掌教
舍五典人倫之外無他物今司徒所掌典曰教典
職曰教職象曰教象灋曰教灋官曰教官則司徒
之掌教大誰不知愚以爲天下後世之惑特未知
教之所以爲教故或局於人民土地之粗則以爲
司徒專掌財賦或厭其粗迹而入於高虛則曰司
徒只教以親義別序信者師氏保氏不過五六員

其餘蓋分托焉夫土地人民之事乃司空之錯簡
而五典亦豈外於十二教耶蓋先儒徒知五典爲
親義別序信不知所以行是五典者有不在於十
二教頒職事荒政保息本俗與夫三物八刑禮樂
也哉愚故曰施教頒職恤其凶荒保其孤弱正其
習俗者教之以事也德行道藝者教之以理也以
禮樂防其情僞而致於中和者教之功也則今司
徒之教亦可遠稽大舜近質穆王矣就謂司空既
亡而司徒專掌財賦哉

小司徒之職掌建邦之教灋以稽國中及四郊都鄙

之夫家九比之數以辨其貴賤老幼廢疾凡征役之
施舍與其祭祀飲食喪紀之禁令比毗志反
施式氏反

釋曰小司徒言建邦則大司徒可知矣故依此補
之也稽攷也國中王城之中六鄉也四郊六遂也
都鄙王畿之都鄙不言邦國者小司徒止教王畿
之內大司徒則及天下也侯國亦建六典有司徒
止奉大司徒之灋以教其國而已一夫一婦為夫
家稽之即下文稽人民而周知其數也九比之數
者即辨其夫家之衆寡與貴賤老幼廢疾之等如
七人授以上地六人授以中地五人授以下地三

等大槩言之耳細分之上有三等亦有三中下
等亦有三所謂上上中中至下凡九等也故為
九比之數後凡言九比者倣此辨其施舍者如一
家三人二人半二人可任者國中自七尺以及六
十野自六尺以及六十有五皆征之是施之也老
者貴者賢者能者服公事者幼者廢疾者皆不征
之是舍之也征謂百畝之稅役謂力役之征蓋周
人每夫受田百畝而取以三征曰粟米曰布縷曰
力役無職事宅不毛者但有夫家則三征不能免
也必如老者以下乃免之故按九比以辨施舍司

徒之大務、祭祀謂州社黨、榮族醕、飲食若鄉飲酒、饗食之類、喪紀族相葬埋之、灋皆有禁令、使不失禮也。

乃頒比灋于六鄉之大夫、使各登其鄉之衆寡、六畜、車輦、辨其物、以歲時入其數、以施政教、行徵令、及三年則大比、大比則受邦國之比要。

釋曰、比灋以九比之數、畫爲成式、夫家衆寡也、六畜、車輦也、稼穡耕耨也、勤惰德行也、優者爲上等、次者爲中等、又次者爲下等、三三而九之、以此灋頒于六鄉之大夫、使之登載其實、以歲之四時入

其數、司徒依此以施其政教、謂使之讀灋、糾勸也、行徵令、謂徵召命令、莫不有一定施舍之籍、大比者、勾考三年中之消息、而頒受之、以上中下之地、稽其勤惰、賢否而黜陟之、賢者能者各有等數、上等賓興、次等進秩、下等降黜、莫不以九比之灋乘之比要者、比灋等第之簿也、六鄉內也、故入其數、邦國外也、故受其要、侯國三年進其要於司徒、乃會萬民之卒伍而用之、五人爲伍、五伍爲兩、四兩爲卒、五卒爲旅、五旅爲師、五師爲軍、以起軍旅、以作田役、以比追胥、以令貢賦。卒子忽反

釋曰會合也卒百人伍五人蓋約伍兩卒旅而爲名也比閭之灋以家起數卒伍之灋以人起數故別其名焉作亦起也田大田也後工力之事比有同行共作之意追逐寇胥伺盜也令貢賦亦用卒伍之灋者令其納粟於官亦以卒伍起之也○丘氏曰司馬灋兵車一乘甲士三人步卒七十二人是一乘者七十五人也約而言之兵車一乘則三兩之數四乘則三卒之數百乘則三師之所合五百乘則三軍之所合積而至於千乘則六軍聚焉六軍之數適足以容千乘乃天子宿衛之兵其餘六遂都鄙之兵悉天子之畿內則爲萬乘矣諸侯大國則有千乘而三鄉則僅止五百乘耳以三鄉三遂言之故曰千乘之國

乃均土地以稽其人民而周知其數上地家七人可任也者家三人中地家六人可任也者三家五人下地家五人可任也者家二人凡起徒役無過家一人以其餘爲羨惟田與追胥竭作

釋曰均土地者地有肥磽則以萊與易佐之而分爲上中下之地此遂人之灋也又稽人民考其數而知其爲上中下之家者蓋上地家七人餘夫多

故受田亦多則爲上地可任者即餘夫未成家不受廛而受里者中地下地亦然皆以餘夫多寡而爲受田之多寡而分也起徒役無過家一人者優餘夫也蓋以正當夫家一人爲正卒餘夫爲羨卒竭盡作行也記曰惟爲田單出里與寇盜非常之變則正卒羨卒偕行不言起軍旅者六鄉之民止供貢賦衛王室而已夫正羨更出者所以番休其力正羨並出者所以重講武事
凡用衆庶則掌其政教與其戒禁聽其辭訟施其賞罰誅其犯命者凡國之大事致民大故致餘子

釋曰用衆庶謂田役與追胥之類政教以令之戒禁以止之皆小司徒所掌有爭競者聽其辭訟有功罪者施其賞罰有不遵誓戒者則誅責之大事田役軍旅之類致會集也大故寇盜水火非常之變也餘子即餘夫羨卒也

原曰司徒所以詳於九比之灋者將以授三等之地也地有三等之不同而三等之中又有三變焉以地之肥磽而分上中下之地者則都鄙不易之地家百畝一易之地家二百畝再易之地家三百畝遂人上地田百畝萊五十畝中地田百畝萊百

月社全錄 卷之四 四十一
畝下地田百畝萊二百畝是也。以壹家受田之多寡而分上中下之地者，則上地家七人，可任者家三人，中地家六人，可任者二家五人，下地家五人，可任者家二人是也。蓋家有上中下而廛則一田萊與易有上中下而餘夫受田皆如之。故知餘夫多則受地多，授地多則爲上地，餘夫多則爲上家，此不易之理也。故九比之瀆所以校其人之多寡，勤惰而授以三等之田，受田之後又校其人之多寡而分三等之地也。司馬令賦又有三等之地者，以其地之墾闢多寡與人可用之多寡而分，則據

成功而言耳。其曰上地食者三之二，可用者家三人，中地食者半，可用者二家五人，下地食者三之一，可用者家二人，曰食者謂其耕治而可養人者耳。曰可用者謂其可簡稽而爲兵者耳。故曰以地與民制之，然後賦之以兵，斯不謂以墾闢多寡而分三等之地乎。愚故謂三等之地有三變，苟不然則上家授以上地田百畝，中家授以中地田二百畝，下家授以下地田三百畝，地有定數而家有定人，一恒人可辨之。小司徒又何察察於九比之稽哉。且上家餘夫多而上地田數少，中家人少而下

地田數多則上家有力無可耕之地下家無力而地多不能耕先王經制固如是取

乃經土地而井牧其田野九夫爲井四井爲邑四邑爲丘四丘爲甸四甸爲縣四縣爲都

釋曰井牧固是司空之大務今在司徒者以司徒掌六鄉井牧之灋雖始自六鄉然制井之灋必有夫畛涂道路遂溝洫澮川乃成井牧故司徒只言田之實數而經制之灋則在司空也可耕之地爲井可畜之地爲牧言牧則山林藪澤丘陵原隰皆舉之矣遂人授田以萊和之萊即牧也○葉氏曰

此泛言經土地耳夫井牧之制通之天下可也井邑丘甸縣都無往不同井方一里凡九夫受田九百畝邑方四里三十六夫受田三千六百畝丘方十六里百四十四夫受田萬四千四百畝甸方六十四里五百七十六夫受田五萬七千六百畝縣方二百五十六里三千三百有四夫受田二十三萬四百畝都方一千二十有四里九千二百十六夫受田九十二萬一千六百畝中爲公田之數在內經野不殊乎九夫度地不離乎三等受田不過乎百畝此井田定制也

丘氏曰甸方八里旁加一里則方十里爲一成積百井其中六十四井爲田其三十六井則山川城郭縣方八十里旁加十里則方百里爲一同積萬井其中六千四百井爲田而三千六百井爲山川城郭以四數之田之實數司馬灋以十數之兼山川城池而言也丘甸則用之於鄉遂及公邑縣都則用之於采地鄉遂公邑非無縣都也有縣都之制而民受地者特一夫之田與夫宅田賈田士田之類未至於縣都也采地之所受亦非無井邑丘甸也井邑丘甸見於縣都之中唯卿大夫之所受

者或四十里或八十里此所以必畫爲縣都之制也但野外之田不無美惡肥磽之差豈必盡如指掌之平基盤之畫哉唯有井有牧比折而行乃是井田之活灋周禮一書皆通率而備言之楚爲掩所謂畫土田度山林鳩藪澤辨京陵表淳鹵數疆潦規偃豬町原防牧隰臯井衍沃即成周之遺灋也所謂井九百畝者非必皆平土上地也因地形之所遇而爲之計度可以知井田之說矣故井田之灋始於唐虞以至夏商稍稍葺治而大備於成周

以任地事而令貢賦凡稅歛之事乃分地域而辨其
守施其職而平其政

政音征

釋曰此主六鄉言之任地事者既授之田遂任以
耕治之事也貢者詩曰中田有廬謂公田百畝內
以二十畝分八家爲廬舍又二畝半在邑於墻下
植桑以供蚕事因取其布帛以爲貢故大府謂之
九功也賦者貢灋地稅之中出泉爲財賦也稅歛
之事公田之稅粟也歛收也謂就公田中所歛也
分地域正其經界也辨其守定其業也施其職施
九職於田事之中也平其征使之供貢稅出車役

各有常灋而均一之無使有輕重也

凡小祭祀奉牛牲羞其肆小賓客令脩野道委積大
軍旅帥其衆庶小軍旅巡役治其政令大喪帥邦役
治其政教

釋曰小祭祀王玄冕所祭者小賓客諸侯之使臣
也此二事大司徒主其大小司徒主其小宜矣大
軍旅則以旗致萬民小司徒當帥其衆庶以與之
大軍旅大田役大司徒治其徒庶之政令小軍旅
小巡役則小司徒當治其政令喪役者正棺引窆
復上之事帥領六鄉衆庶以役其事而治其政教

凡建國立其社稷正其畿疆之封凡民訟以地比正之地訟以地圖正之

釋曰建立邦國必設其社稷之壇壝使各有所奉正其疆域之界限使各有所守蓋社稷疆域國之重事故小司徒立之亦可以見司徒掌邦國矣地比即五家為比之比地圖田野及屋宅閭巷之圖也民之爭訟是非則以比鄰之人正之民之爭疆界地域則以所在地圖正而斷之此小司徒所以聽訟而以無訟為本也

致事

釋曰屬官司徒之上中下士也群吏鄉中受治職之官也治成治事成功之績也要會群吏所上之計簿也此一歲之終考治之事其本屬之官則責其成功以詔誅賞其六鄉之吏則攷正其計簿上其事於大司徒以待冢宰之考績而行黜陟也正歲則帥其屬而觀教灋之象狗以木鐸曰不用灋者國有常刑令群吏憲禁令脩灋糾職以待邦治釋曰帥屬則司徒之僚屬群吏則六鄉之吏也憲表懸之也脩灋防虧廢也糾職防緩散也正歲改

歲之時教灋未頒於天下大司徒乃縣之於地官之所小司徒則帥僚屬往觀焉木鐸之戒戒司徒之屬也小司徒又令六鄉之吏遵司徒之禁令脩明教灋糾正職事以待邦家之政治也

及大比六鄉四郊之吏平教治正政事攷夫屋及其衆寡六畜兵器以待政令

釋曰六鄉四郊之吏謂鄉遂中之群吏也言四郊則六遂亦以六鄉之教灋行之可見鄉灋通之天下矣教治讀灋糾戒之事政事比灋訟獄之事夫屋即田百畝夫一廛也衆寡即家七人六人五人

也蓋三年大比之時小司徒則帥六鄉六遂之教官平其教治之優劣正其政事之得失攷其受田之夫廛里之屋及家人衆寡六畜登耗兵器脩乏上於大司徒司徒上之冢宰詔王廢置誅賞之故曰以待政令

原曰先王教民之灋固已備見於大司徒矣若其灋之施行則小司徒盡之而小司徒所執以行教灋之要則九比盡之今觀比灋不過稽其夫家之衆寡也辨其老幼貴賤廢疾也六畜車輦之多少也田器兵器之苦良也耕種樹藝之勤惰也是數

者若甚煩而且末上之人宜不足恤也而小司徒之職乃顛顛焉從事於此月有要也歲有會也三年有大比也群吏之誅賞無不以是也夫以堂堂司徒豈無所事而所職乃民間之細務此有故矣夫天下之治在於民得其所得其所則治失其所則亂夫民之所急有不在於衣食乎是故稽其夫家之衆寡將以授三等之田也辨其老幼貴賤廢疾將以行征役之施舍也稽其畜器展其治事將以別勤惰行黜陟也自其夫家之稽也而生厚焉自其器事之展也而用利焉自其勤惰之別也而

德正焉德正則俗善用利則民安生厚則民富斯三者聖人所以使天地萬物各得其所也雖唐虞雍熙之治亦不出此矣後世乃以為民間之細事廟廊之上不一及焉此古今所以判歟

鄉師之職各掌其所治鄉之教而聽其治以國比之灋以時稽其夫家衆寡辨其老幼貴賤廢疾馬牛之物辨其可任者與其施舍者掌其戒令糾禁聽其獄訟

釋曰受命朝廷專治六鄉者鄉師而已雖居司徒屬首治灋只及六鄉不及天下以四人而治六鄉

則亦未嘗分治也。若鄉大夫以下皆在民之官，無不聽命於鄉師。故曰：掌其所治鄉之教，而聽其治。聽謂平察之也。國比即九比之灋，制之於王。司徒頒之，故稱國焉。惟夫家有衆寡，故必辨其可用與可免也。其戒令糾禁與獄訟，皆鄉師專掌之。是比灋，鄉師所執以治鄉之大權也。鄉大夫以下，惟攷其實，上其數於鄉師。鄉師校其比而等第之，致於司徒。大比則執此以行廢置誅賞。其聽治之灋，先之以戒令，次之以糾禁，終之以聽訟，所以治之而謂之教也。

大役則帥民徒而至，治其政令。既役則受州里之役，要以致司空之辟，以逆其役事。凡邦事令作秩叙。

釋曰：此言鄉師掌役也。大役如築城造邑之類，未至則帥之，既至則治之。政令徒役之政教命令也。役畢則州里之長謀其章程於簿，致之鄉師。鄉師受之，以致司空所均之力。政必均平，然後鈎考其所作之役事。凡邦事小役也，秩常也。叙次也。令鄉吏依常作之，不親蒞也。

大祭祀羞牛牲，共茅菹。大軍旅會同，正治其徒役。與其輦輦戮其犯命者。大喪用役，則帥其民而至，遂治

之及葬執纛以與匠師御匱而治役及窆執斧以泣

匠師

蘓音菹輦九玉反音菊纛
桃報反匱音舊窆音殿

會同立宗其封外與

釋曰此言其喪祭之執事也羞牛牲與司徒奉之也茅以縮酒菹以藉祭此共於甸師及祭入于鄉師共之也輦輦皆小車輦駕馬輦人輓行所以載任噐也止則以為蕃營大軍旅會同稍人作其徒役輦輦帥以至鄉師則治之而已有犯教令者惟鄉師得執而戮之者權之所在也大喪則帥民至其所監督其事纛羽葆幢也匠師葬事之師也鄉師執纛以指麾輓匱之役樞在路恐有傾覆故與匠師御正其柩而監督役人之窆窆葬下棺也及下棺又執斧以臨備豐碑之用也

凡四時之田前期出田灋于州里簡其鼓鐸旗物兵器脩其卒伍及期以司徒之大旗致衆庶而陳之以旗物辨鄉邑而治其政令刑禁巡其前後之屯而戮其犯命者斷其爭禽之訟

釋曰此言其司田獵之事也四時之田春蒐夏苗秋獮冬狩是也田灋田獵之灋度即所當用之噐與當用之人也鼓鐸旗物兵器則閱之卒伍之灋則脩治之此田之先事也大旗熊虎之旗也致衆

庶則植旗致於其下也陳之者表正其行列也每鄉各有旗以爲號鄉師則以旗物分別其鄉邑之人使各立於其處而聽指麾然後治其政令而使之從憲其刑禁而使之避也車徒屯聚前後異部巡之所以脩正其部伍也其有違犯命令者則執而戮之軍灋尚嚴也獵得禽而爭則聽斷之

凡四時之徵令有常者以木鐸徇於市朝以歲時巡

國及野而賙萬民之難阨以王命施惠

難音艱

釋曰四時徵令有常如歲時屬民正月命脩封疆二月雷且發聲之類皆用木鐸徇于市朝以警人

知也以歲時巡國中之民有不得其所者巡野中之民有不足不給者量度以行補助之政如旅師所聚三粟春頒而秋歛之如遺人所掌鄉里委積皆奉王命而施惠澤於民此巡省賙民之事也

歲終則攷六鄉之治以詔廢置正歲稽其鄉噐比共吉凶二服間共祭噐族共喪噐黨共射噐州共賓噐鄉共吉凶禮樂之噐

釋曰鄉師教官之攷也故四人共掌六鄉歲終共相參攷六鄉之吏治以詔王行廢置之灋焉鄉噐禮噐也噐有大小及所用之不同則分其民居多

庶則植旗致於其下也陳之者表正其行列也每鄉各有旗以爲號鄉師則以旗物分別其鄉邑之人使各立於其處而聽指麾然後治其政令而使之從憲其刑禁而使之避也車徒屯聚前後異部巡之所以脩正其部伍也其有違犯命令者則執而戮之軍灋尚嚴也獵得禽而爭則聽斷之

凡四時之徵令有常者以木鐸徇於市朝以歲時巡國及野而調萬民之躅阨以王命施惠

躅音艱

釋曰四時徵令有常如歲時屬民正月命脩封疆二月雷且發聲之類皆用木鐸徇于市朝以警人知也以歲時巡國中之民有不得其所者巡野中之民有不足不給者量度以行補助之政如旅師所聚三粟春頒而秋歛之如遺人所掌鄉里委積皆奉王命而施惠澤於民此巡省調民之事也

歲終則攷六鄉之治以詔廢置正歲稽其鄉器比共吉凶二服間共祭器族共喪器黨共射器州共賓器鄉共吉凶禮樂之器

釋曰鄉師教官之攷也故四人共掌六鄉歲終共相參攷六鄉之吏治以詔王行廢置之灋焉鄉器禮器也器有大小及所用之不同則分其民居多

寡而共之以備行禮之用官又常稽之令民耳聞目見所以習禮樂之意於平時此成周之治所以禮備樂和粹然盛美也鄭氏曰吉服祭服也凶服弔服也比長主集爲之祭器者簠簋籩豆之屬閭胥主集爲之喪器者夷槃素俎揭豆軼軸之屬族師主集爲之此三者民所以相共也射器者弓矢幅中之屬黨正主集爲之州長或時行禮於此黨也賓器者樽俎笙瑟之屬州長主集爲之鄉大夫或時賓興賢能於此州也吉器若閭祭器者也凶器若族喪器者禮樂之器若州黨賓射之器者也鄉大夫備集此四者爲州黨族閭有故而不共也愚謂族相葬故共喪器射於州序故黨共射器賓於鄉故州共賓器卑者備爲尊者用也至於吉凶禮樂全具之大器則非鄉大夫莫能備其全也

若國大比則攷教察辭稽器展事以詔誅賞

釋曰歲終考校正歲稽器三歲大比則攷六鄉群吏之教德行道藝之進與否察吏致事之辭情實與否稽其禮器兵器田器精良與否展其鄉之民事或治與否以告於王而行誅賞之灋焉

原曰鄉大夫既以卿爲之州長又中大夫也鄉師

乃以下大夫而秩居其上何也曰六鄉之中受命天子秉刑政之權以治之者鄉師而已若鄉大夫州長其秩雖尊一聽鄉師制治之灋也今觀一職之中稽夫家辨施舍也則曰掌其戒令糾禁聽其獄訟大役則治其政令邦事令作秩叙則刑禁之事官府常灋鄉師掌之矣其於軍旅會同田役喪紀皆掌其刑禁戮其犯命至於巡郊野調糴阨給補助大比則攷教察辭稽噐展事以詔王誅賞是鄉中大權無不秉於鄉師也然後知鄉遂之師爲治鄉遂之正官與鄉大夫而下所掌之糾戒禁令不同矣况黨正族師又皆在民之官乎宰夫八職二曰師掌官成以治凡則鄉師之職可知矣况鄉師之下又有上士中士下士皆所以治鄉大夫以下之人乎苟不明乎在位在職之辨此品秩之崇卑何以處之

周禮全經卷之四

一曰
 二曰
 三曰
 四曰
 五曰
 六曰
 七曰
 八曰
 九曰
 十曰
 十一曰
 十二曰
 十三曰
 十四曰
 十五曰
 十六曰
 十七曰
 十八曰
 十九曰
 二十曰
 二十一曰
 二十二曰
 二十三曰
 二十四曰
 二十五曰
 二十六曰
 二十七曰
 二十八曰
 二十九曰
 三十曰
 三十一曰
 三十二曰
 三十三曰
 三十四曰
 三十五曰
 三十六曰
 三十七曰
 三十八曰
 三十九曰
 四十曰
 四十一曰
 四十二曰
 四十三曰
 四十四曰
 四十五曰
 四十六曰
 四十七曰
 四十八曰
 四十九曰
 五十曰
 五十一曰
 五十二曰
 五十三曰
 五十四曰
 五十五曰
 五十六曰
 五十七曰
 五十八曰
 五十九曰
 六十曰
 六十一曰
 六十二曰
 六十三曰
 六十四曰
 六十五曰
 六十六曰
 六十七曰
 六十八曰
 六十九曰
 七十曰
 七十一曰
 七十二曰
 七十三曰
 七十四曰
 七十五曰
 七十六曰
 七十七曰
 七十八曰
 七十九曰
 八十曰
 八十一曰
 八十二曰
 八十三曰
 八十四曰
 八十五曰
 八十六曰
 八十七曰
 八十八曰
 八十九曰
 九十曰
 九十一曰
 九十二曰
 九十三曰
 九十四曰
 九十五曰
 九十六曰
 九十七曰
 九十八曰
 九十九曰
 一百曰

